

欽定剿平粵匪方略

欽定勦平粵匪方略卷十九 壬子年

十一月初三日己酉羅繞典張亮基駱秉章鮑起

豹奏言賊衆分踞省河東西恃有浮橋來往出沒詭譎無常節經我兵圍勦疊次將橋拆斷斷其接濟賊勢日窮惟恃地洞可避槍礮計圖陷城臣等恐賊窮思竄豫先知會向榮和春等將各營追兵派定並飭將弁兵勇無分晝夜不准

擅離堞口十八日黎明兵勇正在掘濠賊因舊
穴斜穿一洞忽將南城轟塌一段寬至八丈有
餘賊衆擁上撲時副將瞿騰龍等督率兵勇
爭先堵擊乘勢搶下缺口追擊殺斃賊匪三百
餘人賊衆因三次轟城均經大挫黨夥精銳半
已死傷其逃過河西賊營者又經朱啟仁張國
樑水陸並勦皆有斬獲十九夜該匪因追勦緊

急乘風雨黑暗河東賊偷渡西岸皆由小路翻
山越嶺四散紛逃臣等伏思賊情詭秘或暗伏
山僻掣動我兵追去仍撲省城或由山徑上下
分馳使追兵無可蹤跡河西道路歧出上下皆
可竄逃旋據探報賊由白箬鋪逃去白箬距甯
鄉縣城僅五十里且有小路可以繞往湘鄉當
卽飛咨署督臣徐廣縉急籌策應堯勦省門現

無賊匪奏八

上命軍機大臣傳諭徐廣縉羅繞典張亮基鮑起豹曰
逆匪分踞長沙省河東西八十餘日疊經我兵攻剿
斷其接濟散其黨與勢已窮蹙前後三次轟城均被
我兵擊敗兇悍黨夥半已死傷其逃過河西賊營者
復因追剿緊急皆由小路翻山四散紛逃現在賊由
白箬鋪逃去此地距甯鄉縣城僅五十里有小路可

達湘鄉常德岳州荊州一帶隨處皆可竄越若不嚴
行追捕聽其一路裹脅必至餘灰復然又成巨患著
徐廣縉飛飭各鎮將分帶兵勇星速攔追乘其紛紛
逃潰之時痛加勦洗速蕨大功至省城防兵仍應安
設著羅繞典張亮基鮑起豹等督飭在事文武官紳
加意巡防毋稍鬆懈

略秉章又奏言臣前奉

諭旨暫留湖南辦理長沙防勦事宜事竣再行奏明請
旨查粵匪竄擾長沙兩月有餘經臣暨羅繞典張亮
基鮑起豹晝夜登陴督飭在城文武竭力防勦
保守危城該匪屢受懲創於十月十九夜由河
西竄逃業經徐廣縉派令福興與向榮和春等
乘勝截追長沙防勦現已事竣謹奏明請

旨遵行奏入

上諭內閣曰前任湖南巡撫略秉章著遵照前旨來京
另候簡用

初六日壬子徐廣縉奏言賊匪於十月十八十九

等日力撲長沙省垣牽掣東路之兵潛於十九
日夜乘風雨昏暗全股過河由金牛嶺一帶翻
山逃竄福興等在象鼻壩營盤聞信當卽督帶
兵勇由小路渡河追至牛頭山地方截擊獲勝

賊匪四散向榮駐紮北岸亦卽派總兵馬龍等
追勦至安樂鋪地方見賊尙有三四千人卽督
率兵勇奮力直前斃賊不少該逆且戰且走我
兵卽於安樂鋪紮任向榮亦於是夜趕到探得
逆匪已至甯鄉據獲犯供稱有欲往常德者有
欲往寶慶者臣等查匪徒旣至甯鄉非南竄寶
慶卽北竄常德必須趕緊兜圍遏其奔突福興

等兵力尙單卽揀派和春秦定三李瑞王錦繡
四鎮之兵及瞿騰龍所帶鎮筈勁旅計五千餘
名趕上福興等營盤合力前進兵力已厚足資
追剿又另派知府江忠源督帶兵勇二千名趕
赴湘鄉截其竄寶慶之路至北竄常德惟益陽
最爲扼要已飛飭向榮由甯鄉設法抄前堵截
並派知府朱啟仁管帶潮勇四千名總兵常祿

帶兵一千七百名及張國樑捷勇四千名馳往
長沙西北一帶攔截遏其竄往湘陰伏查匪徒
此次竄逃實因鹽米將盡且見大兵圍逼漸緊
勢窮力竭鋌而走險竄出後經官兵勦殺其氣
已衰臣惟有嚴督在事文武趕緊勦辦不敢稍
涉遷延致干重咎又查竄出之路與向榮福興
所紮營盤均不甚遠該提督等不能嚴密防堵

咎有攸歸未便因其追勦獲勝稍事姑容應請
旨交部議處以示薄懲奏入

上諭內閣曰此次逆匪因大兵圍勦米鹽將盡紛紛竄
逃經各路兵勇及各團義勇四面攔追截擊斬擒甚
多勢已窮蹙該大臣分派將弁迅速堵扼兵力不爲
不厚該逆卽冒死衝突料難他竄惟當嚴督在事文
武趕緊兜勦務將著名逆首及從逆匪犯悉數殲擒

不准仍任竄逸致干重咎仍隨時知照廣西湖北一體嚴防堵截勿令餘匪竄入至福興向榮所紮營盤距賊竄出之路不遠該提督等不能嚴密堵防福興著交部議處向榮係已革發遣帶罪自效之員著該大臣存記如果追勦得力據實具奏儻始終不能奮勉一併嚴叅重治其罪

十一日丁巳調任山西巡撫湖北巡撫常大寔署

湖北提督江南提督雙福奏言臣等先據探報賊匪自長沙逃竄後擾及甯鄉益陽一帶十一月初三日復接岳州府知府廉昌稟賊由益陽分股竄至湘陰縣林子口相離岳郡一百餘里已稟署督臣徐廣縉等撥兵赴岳堵剿又據湖北派在湘陰縣土星港卡之知縣李嘉瑞疊次稟報賊匪於十月二十六日屯住林子口是夜

有船三隻由蘆林潭下竄經該員與紳士吳士邁督帶漁勇沿河追捕開放槍礮賊船始行竄回復探得賊匪先在益陽搶擄糧食賊衆萬數擄船甚多因林子口設立水卡不能卽下二十八日該匪帶數千脅徧民人幫拆河內卡樁勢將直趨岳州該員與吳士邁因土星港守卡兵勇祇有二千名寡不敵衆現復趕派水卡會齊

船勇水師併力堵禦暨派湖中漁勇準備礮械
等情臣等查前此募備洞庭湖中漁勇二千餘
名在洞庭湖口土星港林子口等處設卡駐守
以期遏賊水路要隘今賊匪大股竄至林子口
雖經委員紳士督率漁勇暫得攔住現在添勇
合力堵擊深虞賊衆我寡且卽水路阻遏又難
保不由陸路奔突傷至岳郡則連壤之湖北荆

州武昌二府皆形喫重擇要分設兵勇無多實
不足恃以制勝亟應添兵趕赴岳郡協助水陸
兜剿早爲殲除臣等駐湖北武昌相去岳郡湖
口六百餘里該處距湖南長沙省城一百餘里
尙屬切近約計南省督撫諸臣此時均已派兵
來岳策應臣等惟恐稽遲復行飛咨署督臣及
湖南撫臣等迅卽籌撥多兵赴岳辦理並咨將

軍台湧提臣博勒恭武暨飭本省各路防所一體加緊嚴備至武昌省城重地凡修理城垣儲備軍需設廠安營等事均經臣等陸續辦理督同官紳訓練兵勇以備戰守惟前此所謂本省及皖豫兩省之兵除派防外此時省城內外存兵僅止二千餘名不敷調遣其前調之陝甘官兵三千名計月內陸續可抵楚省擬俟到時分

別留衛省城及察看賊蹤調派征剿

常大瀆雙福又奏言據委防蒲圻口隘知縣張
開霽探稟賊匪大股已於十一月初三日竄入
岳州府城並准提臣博勒恭武咨稱初三日未
刻探悉賊匪離城僅三十里當帶兵八百餘名
迎剿行至五里排地方遇賊約二千人我兵開
放槍礮斃匪無數官兵亦有損折不料東門火

起復有賊匪馬步齊出從後抄襲我兵腹背受敵不能抵禦以致潰散該提督因馬中槍跌地腰胯受傷此時官兵營盤盡被燒燬不能安紮應撤回省臣等查岳郡爲湖北武昌荊州二府水陸屏障現被賊匪竄入所有湖北邊界各要隘前駐兵勇三五百名更不足恃以堵截其水路已出湖口江面寬廣雖沿岸均設有兵礮仍

恐順流直下難資堵禦現在省城內外存兵祇
及二千陝甘官兵僅到四百餘名其餘二千數
百名尙未據報入境情形甚爲緊急卽飛咨徐
廣緝速派大兵趕於捷徑繞出賊前馳來武昌
援勦臣等已督率官紳兵勇將守衛一切事宜
星夜嚴備惟盼南省大兵速到俾得迅殲醜類
救靜地方奏入

上命軍機大臣傳諭徐廣縉羅繞典張亮基鮑起豹常
大瀆雙福台湧曰逆匪竄入湖南節經降旨諭令該
督撫等派委提督博勒恭武帶兵駐紮岳州專司防
堵乃於十一月初三日賊匪由湘陰竄至巴陵博勒
恭武帶兵迎擊旋即東門火起賊匪從後抄出營盤
盡被焚燬以致府城失守是顯有匪徒濶入岳城爲
賊內應該城文武防禦日久何以毫無覺察殊堪痛

恨岳州以北尙有蒲圻嘉魚咸甯等縣何以不擇要
堵截遽稱撤兵回省豈蒲圻等縣竟全然置之不顧
耶前此賊竄甯鄉據徐廣縉奏稱派和春秦定三李
瑞王錦繡四鎮及瞿騰龍等各帶勁兵與福興向榮
等合力追剿何以任賊肆竄並據稱令向榮設法抄
前堵截另派朱啟仁常祿張國樑等各帶重兵遏其
竄往湘陰之路何以此次賊匪經由湘陰縣屬竄入

岳州且府城文武何以全無準備致賊匪如入無人之境種種情形殊不可解徐廣縉自粵赴楚業已遲延及到湘潭正賊匪窮蹙圖竄之時屢接奏報亦知杜賊竄路爲最要關鍵何以亦蹈從前覆轍耶此時賊踞岳州是否分股北擾蒲圻以北水陸要隘如何堵截著該大臣迅卽統帶大兵親往岳州一帶嚴督各提鎮等設法繞出賊前併力兜剿斷不得再任奔

突常大瀆雙福駐紮武昌防護省城及境內水陸緊
要地方與台湧分飭文武嚴密防堵徐廣縉仍當設
法派兵接應朕連日望報甚殷該大臣想已續有奏
報在途以後軍情務須隨時由六百里馳奏以慰朕
懷提督博勒恭武受傷是否屬實何以任兵潰散著
先行革職仍著查明據實具奏岳州府城文武下落
一併查明奏聞湖南省城現有張亮基鮑起豹駐守

羅繞典著暫留湖南若有應行帶兵堵剿之處著該大臣等酌量籌辦毋誤事機此次賊竄究係何路失防致令復肆猖獗著徐廣縉確查嚴辦毋稍姑息朕細察湖南軍營積習總由帶兵大員不能豫出賊前迎頭兜剿或設伏要隘攔腰截擊其在後追剿之兵又不肯跟蹤緊躡卽如徐廣縉前奏內向榮於追賊喫緊之時又以兵單爲詞俟調省城兵到隨後尾追

此等舉動安能不失機會耶該大臣統領大軍責無
旁貸南北兩省皆所統轄現在賊已竄踞岳州咽喉
要路爲其所扼軍餉銀兩何路繞越荊州防兵亦單
武昌城守尤要該大臣應於何處駐紮調度必當全
盤籌畫勿致顧此失彼陝甘續調之兵迅速催令趕
到兵貴神速當此萬分喫緊之際若不就現在兵將
相機調遣卽再調遠兵亦緩不濟急朕宵旰焦勞省

躬滋懼該大臣等同膺委任當如何盡心竭力爲朕分憂也

十二日
戊午

上命軍機大臣傳諭徐廣縉羅繞典張亮基鮑起豹台
湯常大瀆駱秉章雙福曰昨據常大瀆等奏逆匪竄
入岳州已由六百里加緊諭令徐廣縉迅統大兵親
往督勦岳州爲北省屏障最關緊要前於九月間因

博勒恭武在岳州防堵兵力尙單且未知能否得力
屢次諭令徐廣縉等速派精兵數千赴岳扼要嚴防
卽該大臣前奏亦因岳州緊要請將續調之兵分駐
防堵嗣據常大瀆博勒恭武先後奏報查辦臨湘土
匪情形恐其南竄與長沙大夥勾結復降旨令徐廣
縉等速派精兵前往南北要隘合力防剿原以防守
岳州爲第一要務朕早料賊匪詭詐必由此略此北竄

卽該大臣亦見及此何以此次賊匪竄入岳境竟無
湖南派往官兵與博勒恭武會同夾擊且博勒恭武
係湖北提督越境防守該督撫等何以不早派得力
鎮將協同防守該大臣於奉到疊次諭旨漫不經心
以致賊匪肆行無忌竟陷岳州該大臣前派朱啟仁
常祿張國樑等分帶兵勇遏賊北竄湘陰之路統計
八千餘人兵力不爲不厚若能抄出賊前或跟蹤緊

躡與博勒恭武前後夾擊卽不能掃數殲除賊匪亦當大受懲創何致逆燄復熾至岳州城內文武各官如果豫防奸細查拏嚴密何至有東門失火之變種種貽誤實堪痛恨現在逆匪是否全股占踞岳州逆首洪秀泉等是否在內有無餘匪他竄該大臣務當迅統大兵速赴岳州或間道繞至岳州北路趁此賊匪聚在一處設法圍攻斷不可稍延時日致賊分踞

城外村莊要隘或擄掠江面船隻分股四竄岳州東
達武昌西達荊州均關緊要常大瀆雙福等現在湖
北省城防堵本日已有旨令駱秉章留於湖北幫同
辦理台湧防守荊州兵力亦形單弱仍著該大臣速
派勁兵及續調到陝甘新兵酌量分赴武昌荊州協
同守禦總以鎮撫人心爲要萬勿再有疏虞至漢口
地方商賈輻輳爲大江南北咽喉尤賊匪垂涎之地

必應設法防護且恐匪徒溷跡勾串更須嚴密查拏
奸細飭令地方官督率紳耆合力團練以資保衛岳
州爲兩楚重地一旦失守該大臣督撫等自問當得
何咎昨已據常大瀆奏到而湖南奏報今日尙未接
閱不勝焦灼此後緊要軍情務須隨時馳報以慰懸
念

上諭內閣曰前有旨令駱秉章來京另候簡用現在計

已行抵湖北著卽留於武昌省城幫同常大瀆辦理
防堵事務

十五日

辛酉

徐廣縉張亮基羅繞典駱秉章奏言

十月二十二日賊匪竄至甯鄉縣城外向榮已
於安樂鋪拔營追及賊卽排列抗拒我兵分三
隊進攻該匪勢不能支由城外小路竄往益陽
一帶而去我軍於二十三日追至蒼水鋪匪已

搶得多船搭造浮橋渡河徑到益陽向榮當卽
率同總兵馬龍郭仁布緊追該匪分股回拒向
榮令明安泰等督隊進攻斃賊多名該匪退至
河邊各村屯紮我兵恐有埋伏未敢再追而查
看河內船隻數百號盡爲賊擄我兵無船可渡
各鎮追剿之軍一時不能繞出賊前查該匪旣
已擄船則水路可自龍陽至常德亦可自湘陰

至岳州而岳州爲北省咽喉扼要之地尤爲喫緊臣等一聞探報立即商派總兵常祿及都司張國樑之兵趕赴湘陰堵截復另派總兵和春秦定三王錦繡李瑞督帶大隊馳往岳州並飭令確探賊蹤攔頭迎擊向榮等追勦之軍於二十五日齊抵甯家鋪趕緊於沿江尋覓木簞竹簞搭造浮橋以便我軍過渡續據探報賊從益

陽走藍溪欲往林子口逃竄向榮卽派總兵郭仁布等統帶官兵從藍溪進剿二十六日郭仁布等於五更出隊直抵藍溪該匪擁出四五百人分數隊拒敵官兵迎擊從辰至巳相持兩時許擊斃多名無如賊來愈衆勢難抵敵正在喫緊之際適福興援兵趕到賊始敗入村內拒守二十七日向榮福興親率官兵五更出隊探得

該匪已於初更時全股逃竄並沿江擄船多隻
分向西林港前竄當卽催兵前進沿路橋梁俱
被該逆拆斷必須紮筏渡河以致兵行不能迅
速二十八日由河岸跟追所走均田塍小路兵
勇魚貫而行甚爲遲滯向榮恐誤進勦卽督率
兵勇先由別路渡河繞出湖陰截擊而該匪前
隊已於二十八日由林子口竄撲蘆林潭連夜

竄往湘陰二十一日早至南門外對岸扁擔峽
地面開放槍礮並放船隻過河該縣莊心庠正
在督飭兵勇堵禦適常祿張國樑趕到當卽督
飭兵勇沿河施放槍礮該匪見有援兵不敢拒
敵退回原路向榮亦於十一月初一日行抵湘
陰探得該匪前隊已在營田起程將船隻及重
笨之物全行拋棄由陸路竄往歸義驛地方屯

踞查歸義地面大路係往岳州小路可由平江
竄出與湖北之通城崇陽蒲圻等處毗連該匪
詭譎異常偵知我兵趕赴岳州難保不由小路
逃竄是以前派和春秦定三等抄截卽飭由大
荆一路行走可冀抄出賊前現又專派提督蘇
布通阿帶川兵專向平江一帶前進截其竄往
北省之路惟逆匪前在益陽有河可阻該縣並

未將河面船隻全行收往僻港以致匪得渡河
進城據掠實屬罪無可逭應請

旨將益陽縣知縣陳應台革職拏問訊明有無退避情
形照例治罪再臣徐廣縉已於初一日移紮長
沙奏入

上命軍機大臣傳諭徐廣縉羅繞其張亮基駱秉章曰
逆匪竄至安樂鋪地方據該大臣奏報不過三四千

人迫竄至甯鄉後又據該大臣派令知府朱啟仁帶潮勇四千名馳往長沙西北一帶遏其竄往湘陰湘陰係赴岳州必由之路且堵賊之兵數已倍半何以任賊直竄岳州毫無堵禦聞該大臣等本日奏到連日追剿情形所有帶兵將官及兵勇等一味尾追從無一路繞出賊前者相沿惡習實屬可恨至所稱賊退至河邊各村我兵恐有埋伏未敢再追又於二十

八日由河岸跟追所走均田滕小路兵勇魚貫而行甚爲遲滯若云均係田滕向榮何以繞別路行走可見俱屬捏報以掩飾遲延之咎是沿途追剿之兵顯有耽延情事且水路船隻亦帶兵大員早應籌辦之事何以不豫爲布置使賊先已搶占我兵轉無船可渡顯係藉詞諉罪以掩其遷延玩誤該大臣等僅叅一縣令了事豈於軍營惡習竟不加察岳州失守數

日該大臣等近在長沙尙茫然不知惟聽各將官等飾詞稟報任其耽延貽誤抑已知岳郡失事故分兩次奏報耶似此舉動豈不又蹈從前覆轍徐廣縉著卽遵前旨迅統大兵間道馳赴岳州迤北一帶督剿毋得再有遲滯並著查明追剿不力及岳州失事各員分別擬罪具奏儻查有臨陣退縮及坐視不援者一面奏聞一面以軍法從事毋稍寬縱徐廣縉到楚

以來軍營並未有起色朕用汝朕自知愧第問汝於心何忍何安

上諭內閣曰本月十一日據常大瀆等馳奏逆匪於十一月初三日竄入岳州府城摺內僅稱賊至岳州提督帶兵接仗旋即東門火起府城失守並未將城中文武防堵情形及湖南追兵是否應援之處詳細具奏當降旨將博勒恭武先行革職諭令徐廣縉等迅

速追截堯勦數日以來望報甚殷乃本日據徐廣縉等馳奏猶是十一月初一日以前沿路追勦各情該大臣於本月初一日移營長沙此摺係初七日奏報何以初三日岳州失守之事毫無見聞軍營偵探所司何事據稱帶兵大員等於初一日已抵湘陰距岳州甚近豈前途失事遲至數日尙無稟報耶覽奏憤悶殊不可解徐廣縉羅繞典張亮基駱秉章均著先

行交部議處岳州湘陰一帶乃南北兩省要隘朕早料及賊匪窮蹙必由此路奔竄九月間屢降諭旨令該大臣等派撥精兵前往協防卽徐廣縉前次奏報亦經派兵扼賊北竄之路何以博勒恭武與賊接仗並無湖南追援官兵前後夾擊近日軍營積習賊來不擊賊去不追種種膽玩實堪痛恨若不嚴申紀律何以整飭戎行著徐廣縉等遵照前旨查明賊由何

路竄越帶兵各官何人追勦不力僉係臨陣退縮坐
視不援卽著一面奏聞一面以軍法從事徐廣縉由
粵赴楚本已遲延若不親督鎮將就近調度任聽飾
詞稟報貽誤事機自問當得何罪長沙省城現有羅
繞典張亮基與鮑起豹等防守徐廣縉著卽統帶大
兵兼程馳赴岳州一帶繞出賊前迎頭截擊提督善
祿計已行抵湖北著卽截留該省扼要駐紮幫同勦

捕武昌漢陽荊州水陸各要隘俱著分派精兵並新
調到陝甘勁旅一律防堵毋任再有竄逸逆匪前在
益陽有河可阻該縣並不將船隻收往僻港以致匪
得渡河進城擄掠罪無可逭益陽縣知縣陳應台著
革職拏問治罪仍查明岳州失事文武各員據實具
奏

十七日

癸亥

徐廣縉張亮基羅繞典駱秉章奏言

據向榮函稱初三日督率常祿等兵勇趕至大
荆鋪聞逆匪連夜逃竄將到岳州當卽拔營追
趕一面專弁移咨在岳防堵之提督博勒恭武
囑其靜鎮嚴防能固守一二日大兵卽可趕到
乃向榮於初四日行抵岳州之新口鋪地方已
聞岳州失守並有巴陵縣走出之犯詢據供稱
岳州官員於初二日先已出城初三日早知縣

亦卽出城午刻賊分三股湧至官兵全行潰散
城門大開無人把守該匪隨卽進城城內火藥
大礮及餉鞘一切均已資賊等因 臣接報之下
憤懣難言查岳州有提督博勒恭武昌道王
東槐帶兵在城防堵城池亦尙完固賊卽十分
猖獗守禦總屬有餘但能固守兩日則向榮之
兵已至儘可扼其前竄乃竟望風而潰從前所

稱雇募漁勇種種防堵盡屬虛文實屬罪無可
追此時匪踞岳州水陸俱可竄往武昌如由武
昌北渡則漢陽荊州等屬無處不當嚴防已飛
飭向榮派兵四五千名由通城崇陽一帶迅速
繞出武昌以資援剿現在賊蹤尙無定向俟確
探匪竄何處臣亦卽督率將弁趕往剿辦惟是
沿江上下防不勝防賊匪奔竄剽疾稍有疏虞

則豫皖江西等處不免震驚臣徐廣縉力小任重似此情形斷非一人所能兼顧惟有仰懇

皇上天恩另派重臣分路堵剿並飭附近湖廣各省督

撫專力堵防俾臣徐廣縉專辦督剿庶期迅掃

賊氛其失守岳州文武員弁俟確切查明嚴叅

治罪臣徐廣縉調度乖方致派往攔截及追剿

之兵均不能迅速趕上咎無可辭應請

皇上嚴行治罪以儆玩弛

同日常大瀆雙福奏言疊據探報該匪於十一月初三初四等日全股竄踞岳城後卽擄掠商船由湖南臨湘縣之城陵磯陸續轉竄湖北歷監利縣之楊林磯嘉魚縣之蘆溪口箴洲順流直下約有船四五百隻賊衆數萬多係勾結土匪裹脅平民沿途口隘所設兵勇雖經堵截攻

擊而賊船假扮商船溷雜莫辨所有湖南甯鄉益陽一路賊匪全歸岳州一路北竄現探首逆賊隊尙踞岳州攔阻向榮等追剿之兵聞俟衆匪齊抵武昌卽行登岸攻撲省城首逆亦卽率衆竄來頃又探報前股賊匪已先後至江夏縣之金口肆行燬掠距省城僅六十里臣等查湖北省城周圍二十餘里前存防兵及現到陝甘

官兵共祇三千餘名其雇募民勇亦僅一千數
百名堵守城堞尙屬不敷何能備勦且對江之
漢陽府城暨漢口鎮商賈雲集均無兵勇防守
臣等雖於武漢上游派有戰船水師堵截未識
能否抵禦况該匪棄舟登岸陸行更近實屬萬
分危急業已督同官紳兵勇登城嚴備雖民情
堅定可期固守危城若援兵遲到亦慮事不可

測仍懇

天恩飭下徐廣縉迅卽帶兵來北不勝懸望迫切之至
均奏入

上命軍機大臣傳諭徐廣縉羅繞典台湧張亮基駱秉
章常大瀆曰該匪突入岳州守城官員瞻敢紛紛出
城以致郡城失守火藥大礮餉輜均已資賊可見湖
南地方官吏前此並未講求守禦殊堪痛恨卽如城

陵磯地勢險要向榮等追剿之兵何以不疾行繞前扼守任令順流北駛該大臣所調度者何在現在該匪據船四五百隻聚眾數萬直抵距武昌六十里之金口湖北省城危急防兵僅有三千餘名益以王錦繡常祿趕到之兵亦僅五千餘名深恐不敷堵禦且該省沿江直下經九江至安慶瞬息千里防不勝防而對江之漢口尤爲賊所垂涎北由孝感西由荊州

襄陽則河南震驚賊勢剽急所陷城池擄掠卽行並不似永安道州尙爲久踞之計其心叵測若再遷延觀望祇事尾追貽禍何可勝言該大臣等以爲朕不能執法從事耶著徐廣縉親督大兵迅速繞赴武昌設法救援並飛飭向榮等先到之兵與湖北現有兵勇合力攻擊並設法腰擊在後之大股賊匪毋令會齊併力死拒其博勒恭武收回潰散之兵與瑞元防

守蒲圻之兵能否在通城崇陽一帶接應以牽制賊
匪使不能由陸路躡我之後所有各路運到軍餉火
藥與武昌城內軍餉火藥應如何密籌分別布置文
報往來驛路如何繞越省垣備禦之器械土石如何
源源接濟著徐廣縉常大滄等妥密辦理城內奸細
尤須晝夜偵緝防守不力之文武員弁一經查明卽
行按律正法務期保守武昌漢陽兩處於水路上游

嚴兵扼守勿令賊匪更肆竄擾荊州一帶台湧仍遵
前旨嚴密防堵仍著羅繞典等嚴防該匪回竄長沙
常德等郡萬勿再有疏虞致干重罪

上諭內閣曰自賊竄長沙疊經降旨令於岳州荊州各
要隘嚴密堵剿該地方官應如何認真防守乃賊匪
於初三日竄至岳州而該郡官員於初二日初三日
先出城外以致官兵潰散賊匪得以竄入府城是進

不能戰退不能守平日毫無準備遇變卽棄城而逃
似此昧良喪心實出情理之外著徐廣縉等嚴行查
辦此等貽誤員弁若不擇其尤者正法數人何以挽
回積習昨因該大臣等奏報遲延已降旨交部議處
茲據徐廣縉具摺請罪當此軍務緊急調度乖方身
爲統帥豈能辭徐廣縉著革職留任張亮基鮑起
豹均有地方之責著各降四級留任現在賊衆盤踞

岳郡窺伺武昌據常大瀆奏向榮派總兵常祿王錦
繡帶兵赴援已抵湖北省垣仍著徐廣縉飛飭向榮
統領重兵速由通城崇陽繞出武昌截賊前路該大
臣亦卽親督鎮將直赴武昌於水陸要隘分布兜剿
荊州一帶著將軍台湧等一體嚴密防範毋任匪黨
竄逸並著羅繞典張亮基鮑起豹等嚴防賊匪回竄
之路現復添調各省精兵陸續前進誓必滅此醜類

拯我生民該大臣等具有天良其各悉心籌畫庶可
以功補過儻仍前玩忽再失事機其能當此重罪耶
近來地方惡習一聞警報輒藉詞擇險防堵先行出
城規避取巧實堪痛恨著該大臣督撫等隨時嚴查
儻賊經過地方文武員弁仍蹈此等惡習卽一面奏
聞一面正法以昭炯戒而肅軍律

上又諭內閣曰現在逆匪竄入岳州將竄湖北河南省

應辦防堵著派布政使鄭敦謹馳赴信陽州一帶會同南陽鎮總兵柏山扼要籌辦署河南巡撫琦善著迅速起程馳抵楚豫交界地方督飭嚴防前已有旨添調陝甘兵二千名西安駐防兵一千名並帶兵副都統鎮將各員均著交琦善調遣並著訥爾經額於直省官兵內揀派精兵三千名交提督陳金綬統帶隨同琦善前往

上又諭內閣曰現在賊竄岳州江防尤關緊要署江西
巡撫張芾著卽馳赴九江督同該鎮總兵清保及地
方文武辦理防堵其省城事務著布政使陸元烺會
同在籍尙書陳孚恩並司道等妥爲辦理安徽按察
使張熙宇壽春鎮總兵恩長著馳赴沿江扼要處所
會同辦理防堵事宜巡撫蔣文慶仍駐省城就近調
度毋稍疏忽